

## **PREDGOVOR**

**direktora Instituta za historiju  
Univerziteta u Sarajevu  
dr. sc. Sedada Bešlije**

Institut za historiju Univerziteta u Sarajevu je naučna ustanova u 65. godini svoga rada i djelovanja čija je osnovna zadaća proučavanje prošlosti Bosne i Hercegovine od najstarijih vremena do savremenosti. On je danas jedan od 5 naučnoistraživačkih instituta, punopravnih članica i organizacionih jedinica Univerziteta u Sarajevu koji u posljednje vrijeme bilježi odlične rezultate posebno na polju izdavaštva, digitalizacije naučnih dostignuća i međunarodne akademske i naučne razmjene i saradnje.

Najsvežiji primjer uspješne međunarodne akademske saradnje je Međunarodna naučna konferencija “Historija Roma u Bosni i Hercegovini” koju su zajedničnim naporima u februaru 2024. godine suorganizovali Institut za historiju i Institut za društvene znanosti Ivo Pilar iz Zagreba.

U svom radu, Institut za historiju se bavi temama širokog spektra. Radimo na svemu što držimo relevantnim u oblasti historiografije bez ikakvih ograničenja. Pratimo naučnu produkciju, ali i društvene trendove, pokušavamo dati svoj doprinos u rasvjetljavanju manje obrađenih tema, ne bježimo ni od ponovnog sagledavanja pitanja koja ne gube na historiografskoj aktuelnosti. Jednako se nastojimo baviti “velikim” historijskim temama, ali i onima s margina historije i nauke općenito. Sve s ciljem boljeg razumijevanja i spoznaje naše prošlosti.

U tom kontekstu, Romi su kao zasebna populacija nažalost često ostajali i ostali na marginama društava, ali i naučnih istraživanja. Lijepa je izreka koja kaže da se karakter čovjeka mjeri prema tome kako postupa prema slabijem od sebe, a uspjeh jedne vlasti se mjeri prema položaju ranjivih, marginalnih i manjinskih kategorija društva. S tim u vezi, nadam se da će Zbornik radova s navedene konferencije koji objavljujemo biti naputak kako mijenjati pristup ovim i sličnim temama, ali i dati novo svjetlo na određene segmente iz historije Roma u Bosni i Hercegovini te ponuditi smjernice za daljnja istraživanja, što je bio osnovni cilj organizovanja Konferencije.

Na kraju, uz toplu preporuku našeg novog izdanja čitalačkoj publici, svima koji su uzeli učešće u organizaciji Konferencije, te priređivanju Zbornika želim zahvaliti i čestitati na uspješno obavljenom zadatku, posebno inicijatorima cijele priče i urednicima Zbornika radova dr. sc. Danijelu Vojaku iz Instituta Ivo Pilar i dr. sc. Sanji Gladanac-Petrović iz Instituta za historiju.